

Forsa ha cumissari Staub ina pitschna avaina lumneziana

Crimis dad Ernst Solèr

■ (anr/vi) Ernst Solèr è autur da crimis. El è creschì si al Lai da Turitg e fiss burgais da Lumbein. Sia figura principala è Fred Staub da la polizia chantunala turitgaisa. Cumissari Staub regarda mintgatant al «Wachtmeister» Studer da Friedrich Glauser. Mo che Staub ha ina biografia moderna e lavura en la citad. El ha 52 onns, in tec venter, ha ina figlia ord l'emprima lètg ed è maridà ina segunda giada cun Leonie che ha senza era in figl – in pau in purpragnà. Il 2006 è cumpari l'emprim cas dal cumissari: «Staub im Feuer». Ina damaun che Staub va a lavurar, capita in attentat. I vegn dà fiu exact en quel tren ch'il cumissari dovra mintga di per ir a la lavur. Ils attentaders mettan sut squitsch las autoritads da Turitg e pretendan otg milliuns, uschiiglio vulan els puspè dar fiu in tren. Staub avess da surdar ils daners, ma la surdada finescha en ina catastrofa. I capita in segund attentat e trais carstgauns perdan la vita.

Il segund cas, «Staub im Wasser», è cumpari la primavaira passada. Questa giada ha il cumissari Staub da far cun il mund da las finanzas. Entaifer curt temp chattan ins trais morts. Igl è trais fiduziaras. A tuts trais han ins taglià giu il chau. In quart acrobat da finanzas ha bravamain la tremblitga. Staub e ses team ston dar chommas per impedir ch'i capita in ulteriur mazzament.

Proxima primavaira cumpara gia il terz cas che cumissari Staub ha da schliar. Il titel: «Staub im Schnee».

Saun, sgarschur e snavur

Ils crimis da Staub sa vendan bain ed



L'autur en la libreria Bertastrasse che ha gia vendì tschients da ses crimis.

han plaunsieu era success ordaifer la Svizra, sco il servetsch da pressa da la chasa editura grafit a Dortmund di. Quai n'ha probabel betg mo da far cun ils cas criminalistics. Cler, i dovra saung, sgarschur e snavur en in crimi. Ma sch'ina seria da crimis ha success u betg dependa cunzunt dal personal che l'autur descriva. Ed il cumissari Fred Staub è propi in tip ch'ins accumpogna gugent sco lectur.

Plinavant è la vita privata da Staub bunamain tuttina interessanta sco sias ponderaziuns criminalistics. Cun sia ex-dunna è el sco chaun e giat. Cun sia

figlia ord l'emprima lètg s'inscuntra el regularmain, e da sia segunda dunna Leonie ha el in coga respect. Sche Leonie di ch'el haja da procurar per ieli d'olivas sicilian ch'i dat sulet en il globus, ha questa cumissiun prioritad, e Staub na ristgass mai da turnar a chasa senza l'ieli giavischà.

Il personal dal cumissariat

En il team da Staub sa sentan ins sco lectur immediat da chasa. L'emprim fissi da menziunar la bella collega Gret. Ella ha ina figura uschè ideala ch'ella po cun 35 onns anc adina purtar clamottas da H&M senza ch'i paress penibel. Cumissari Staub va fitg gugent cun ella a baiver insatge e semia lura adina ch'els fissan insatge dapli che mo collegas.

Tar il team dumbran era Michael Neidhart, el è homosexual e clever. Plinavant Mario, el è adina vestgì piccobello, ma nunduvrabel sco polizist. Tuttina spendra Mario a la fin dal crimi adina a moda miraculosa la vita da ses schef. E sco ultim datti anc il Häberli, il vegl en il team. El fima trais pacs gauloises en di ed è perquai il sulet che ha in agen biro, nua ch'el sa tegna dentant si uschè pauc sco pussaivel. Ma en il seracas pon ins sa fidar da Häberli. El ha qualitads extraordinarias sco interrogatur penetrant. «Gia blers han palesà ad el la vardad sulet perquai ch'els na tegnevan betg ora el e sia fugatscha ch'el sbuffa ora permanentamain.»

Ernst Solèr: «Staub im Feuer», «Staub im Wasser». Chasa editura grafit. Mintgamai 220 paginas. Pretschs, 15.80 e 15 francs. Dortmund 2006 e 2007.

È «Solèr» in num d'artist?

Ernst Solèr (47) è creschì si a Männedorf, viva a Turitg ed è bab d'ina figlia. El ha gia empruvà sin differentas modas da gudagnar ses paun da mintgadi: sco redactor da gasettas e da radio, sco producent da televisiun, sco inventader da gieus (zero, lettro) e sco ghitarist da rock. Dapi il 1999 scriva el. Dad el èn cumparids quatter cudeschs, differentas istorgias curtas, columnas e gieus auditivs.

L'anr ha dumandà l'autur, sch'el haja insumma anc contact cun Lumbrein, ses lieu da burgais. Solèr ha respundi en in email ch'el na discurria betg pli rumantsch, ma el visitia mintga quattertempras anc ses lieu da burgais. Lura sesia el en l'ustaria, baivia ina café u mangia insatge e pensia: «Aha, da qua vegnin nus pia.» Er il santeri, nua ch'i haja tants craps-fossa cun il num Solèr, saja interessant per el.

I dettia adina puspè glieud che pensia che «Solèr» na saja betg ses dretg num, mabain in num d'artist. Lura explitgeschia el adina cun in pau luschezza che quest num derivia dal retorumantsch.

www.ernstsoler.ch